

ISAACI CASAV-
BONI, AD EPISTOLAM
ILLVSTR. ET REVERENDISS.
Cardinalis Perronij,

R E S P O N S I O.

L O N D I N I,
Excudebat IOANNES NORTON,
Serenissimæ Regiæ Maieſtatis, in Latinis,
Græcis & Hebraicis Typographus.

M. DCXII.



ISAACI CASAVBONI,
AD EPISTOLAM ILLVSTR.
Cardinalis Perronij,
Responsio:

ILLVSTRISSIME ET REVE-
rendissime Domine,



Ideor mihi vsu rerum atque experientia magistra didicisse, nullum esse tantum malum, ex quo, aut cuius saltem occasione, bonum aliquod nasci non possit: atque vt dici solet, mel generare fel, sic non absurdè aliquis dicat, è felle merum mel interdum existere. Ne aliunde argumenta petam: fel purum putum erat, idque virulentissimum, perditissimi nebulonis sceleratissimus liber, qui primū materiam mihi præbuit ad illustrem tuam dignitatem Serenissimi Regis iussu scribendi. Tuæ veto binæ literæ, quas ad me postea ex occasione illa dedisti, singulari comitate, humanitate atque prudentia conditæ, niueum candorem auctoris præ se ferentes, quouis melle dulciores mihi fuerunt. Quare neque ego Regi optimo & sapiētissimo tuas ostendere, ac legendas exhibere sum veri-

A ij

tus: & Majestas ipsius, quum non omnia in illis (neque enim fieri aliter poterat) probaret, vtramque tamen epistolam tuam non grauate neque illubenter legit. Gratum ipsi vehementer fuit, vnum saltem aliquem vestrarum partium Theologum sibi innotuisse, virum primum, summæ dignationis, summæ eruditionis, qui ad hodiernarum controuersiarum tractationem placidum & mansuetum ingenium posset adferre. Nam quo spiritu plerique hodie ferantur, qui eius argumenti libros edunt vel illi tot numero scriptores abunde probarunt, qui Apologiam Serenissimi Regis hactenus oppugnarunt, omnes enim si vnum aut alterum excipias, mendacis, maledictis & conuitijs miseras chartas implerunt. Præcipue vero illa verba posterioris tuarum Regem, sincero pietatis zelo flagrantem delectarunt, quibus spem facere videbaris, amicam hanc de rebus ad religionem spectantibus communicationem, fructu non carituram. Quod ut mirandum in modum Regi placitum est, quemuis laborem hac mercede parato subire, quamlibet ærumnam perpeti. ita deficiente hac spe, cur aut eius Majestas, aut tua dignitas sibi negotium facessant, iusta causa nulla fuerit. Spero equidem, si in hanc curam serio tua præstantia incubuerit, effecturum te, cum auxilio Dei opt. max. qua auctoritate es inter tuos, & ingenij atque doctrinæ fama apud omnes, ut non prænitenda aliqua utilitas ad Ecclesiam Iesu Christi ex hac mutua scriptione perueniat. De Serenissimo vero maioris Britanniae Rege, in cuius aula annum iam

integrum, & eo amplius egi, ausim tibi spondere, & omni asseueratione cōfirmare, ita animatum illum esse, ita rationes totius vitæ esse illi comparatas, vt studio pietatis nihil ipsi esse antiquius facile omnes intelligant. Non priuata negotia, non publicæ regni curæ ita solent Maiestatem ipsius afficere, vt immēsum quoddam desiderium res religionis omni ope atque opera promouendi, & quæ maxime cogitatio Regem tantum decet, ingens cupiditas concordix inter dissidentia Ecclesiæ membra, omni recta atque honesta ratione procurandæ. Atque hanc Christiano Principi conuenientissimam sollicitudinem Rex pijsimus non finibus imperij sui, quāuis amplissimi, circumscribit: sed memor Defensorem fidei audire se, etiam vltra orbis sui limites, non animi curiositate, verūm zeli vehemētia, purat sibi hæcenus esse extendendā, vt & regionū aliarum Ecclesijs sua prudentia & Maiestatis auctoritate, si occasio detur, commodet: sibi que religionis Christianæ conseruationem præcipuæ esse curæ Deo & hominibus in dies reddat testatius. Nuper adeo & illo ipso tempore, quo tuæ literæ posteriores sunt ipsi à me ostensæ, huiusce animi sui ~~quod~~ grande documentum Maiestas ipsius dedit, quod bonis pijsque hic omnibus meritissime & probatum & laudatum, ne tibi quidem, Illustrissime Cardinalis, cognitu futurum est, vt i spero iniucundum. Nam quum certio rem per literas Regem fecisset illustrissimus reuerendissimusque Præsul, Dominus Archiepiscopus Cantuariensis,

peruenisse ad manus suas, allatum nescio unde
 ē Germania, aut Belgio librū, quo doctrina con-
 tineretur de natura Dei noua, peruersa, & cum
 antiqua fide Ecclesiæ Catholicæ in nonnullis
 pugnans, rogassetque eius Maiestatem, vt ad re-
 primendū malum recens exortum, veri Defen-
 soris fidei zelum exerens, apud Magistratus di-
 tionis illius, vbi auctor libri degebat, intercede-
 ret; peteretque ab illis, ne doctrinam adeo ἀνό-
 μοτον in Ecclesias, & scholas suas paterentur in-
 troduci, neue hæc profana nouitas eius inuen-
 tori maneret impunita: Rex literas illas descen-
 denti sibi ē rheda post longam venationem red-
 ditas, & librum simul notis obelisque vigilan-
 tissimi Antistitis confossum, vt semel ac-
 cepit, negotium sine mora sibi cognoscendum
 duxit. Ac licet corpus ipsi ē labore & inedia lan-
 gueret, quod ceperat tamen agere vno tenore
 & calore perfecit: neque ab adstantibus Proce-
 ribus exorari potuit, vt rationem sui vllam prius
 haberet, quam re tota diu multūmque conside-
 rata, cum reuerendissimo Episcopo Lichfeldē-
 si, alijsque ē cleto, & penitus perspecta, quod
 suarum erat partium, & pietas iubebat, accurate
 præstitisset. Liber dānatus est, exemplaria iussa
 comburi, cum in vrbe metropoli, tum in vtra-
 que Academia, (quod & postea factum,) literę
 granissimæ, ipso Rege distante, ad Regium Le-
 gatum eo loci commorātem, scriptæ, ac statim
 missæ, iudicij quod de noua doctrina Rex & Ec-
 clesia Anglicana fecissent testes: simul addita
 mandata de appellandis ea super re Magistrati-

bus. Viderint illi, ad quos eius mali tollendi cura propriè pertinet, quam Deo immortalì ratione suæ cessationis sint reddituri; si, quod fieri posse non existimamus, neque sponte sua, neque post exemplum tam insignis, veritatis patrocinium, quanto par est studio & ardore susceperint. Rex Iacobus ad primum, rei nuntium sic est commotus, ut nefas ingens se admissurum crederet, si necessitati corporis aliquid prius indulgeret, quam pietatis hoc officio plane esset perfundus. Non dubito, Illustrissime Cardinalis, quin factum istud sis ipse probaturus impese & prædicaturus. Ego non ut Regem apud te nunc laudarem, quod erat gestum narraui; verum ut scires quàm sit priscae fidei tenax, & dogmatum veræ Catholicæ acris atque animosus defensor, is quem vestrorum Catholicorum plerique censeri aut dici Catholicum non ferunt; multi ne Christianum quidem. Regi primò visa inutilis de appellationibus contentio, dummodo rem teneas; quod facere se, & optat Maiestas ipsius, & in Dei misericordia plane confidit. quoniam tamen vulgo homines priuationem eiusmodi appellationum, rei ipsius priuationem esse & carentiam inter pretantur: non solet Rex neque consultum putat, iniuriam dissimulare. De appellatione Christiani nulla ei tecum lis, nulla controversia: neutra enim epistola tua hunc ei titulum negavit competere: de Catholici titulo quaestio iam est. Priore enim tuarum postquam ea qua excellis, dicendi facultate significasses, in magnæ Britanniae Rege maximi te Principis ideâ agno

scere numeris omnibus absolutam; ad extremū illam exceptionem adiecisti, si ad cæteras animi dotes, Catholici nominis gloria accederet. & quum Regis iussu esset responsum, non posse ei titulum illū denegari, qui tria Ecclesiæ Catholiciæ symbola, Concilia quatuor Occumenica prima agnosceret: quique omnia crederet, per quatuor primorum seculorum seriem credita, tanquam ad salutem necessaria: parum sibi hac responsione satisfactum esse, posterioribus tuis accurate & subtiliter scriptis ostendisti. Hasce literas à Ser. Rege raptim, aut velut in transcurso, lectas fuisse, nolim existimes: nam & totas legit, & momenta rationū miræ animi æquitate & placiditate expendit. Quod autē ne post lectam quidem responsionem tuā, à priore sententia discedit, neque propterea minus Catholicum se esse gratia Dei fretus cōfidit: voluit eius Maiestas, ita statuendi quas rationes habeat, tibi non esse incognitum. Accipe igitur Cardinalis Illustrissime, ad posteriorem epistolam tuā breue responsum: quod ex ore ipso Ser. Regis exceptū, scripto complecti, & ad te mittere sū iussus. Non petam nunc à te, vt ad hæc legenda eam adhibeas æquitatem, quā Rex ad tua cognoscenda: mihi enim satis nota est tua eximia prudentia, & omni laude dignissima moderatio.

Vniuersa posterioris epistolæ disputatio duabus constat partibus. Priore, quinque observationes in mediū afferuntur, quæ thesim istam; *Catholici appellatio nemini denegari potest, qui tria symbola*

symbola admitat, Apostolorum, Nicenum, Athanasianum; qui item quatuor Occumenica Concilia prima, Nicenum, Constantinopolitanum, Ephesinū, & Chalcedonensē; postremò qui omnia credat, primis quatuor seculis existimata ad salutem creditu necessaria; illustrent & quomodo accipi debeant, ostendunt. Hæc thesis in responsione Regia locum propositionis maioris obtinebat. Altera pars aduersus hypothesein, siue assumptionem, quatuor afferre

I. OBSERVATIO.

Nomen Catholici non simpliciter fidem denotat, sed etiam communionem cum Ecclesia Catholica. Idcirco veteres noluerunt Catholicos appellari eos, qui à communionē Ecclesiæ recessissent, licet fidē retinerent. Vnā enim esse Ecclesiam Catholicam, extra quam fidem & sacramenta habere aliquis potest; salutem non potest. In eam sententiam afferuntur multa è B. Augustino.

RESPONSIO REGIS.

CRedere Ecclesiam Catholicam, & credere communionem Sanctorum, ut res diuersæ in Symbolo Apostolorū distinctè ponuntur. ac videtur prius illud eò potissimum fine insertum, ut discrimen statueretur inter Iudaicam Synagogam, & Christianam Ecclesiam; quæ nō ut illa, populi vnus finibus erat circumscriben-

da: sed longè latèque per omnes mundi regiones spargenda. Quare satis manifesta ratio non est, cur huius obseruationis initio dicatur, Catholici appellatio communionē denotare. Sunt quidem duo ista coniunctissima, diuersa tamen, sicut ostendimus. Credit verò Rex simpliciter, sine fūco & fallacijs vnicam esse Ecclesiam Dei & re & nomine Catholicam, siue vniuersalem, toto diffusam mundo; extra quam ipse quoque nullam salutem debere sperari affirmat. dānat & detestatur eos, qui vel iam olim, vel postea, aut à fide recesserunt Ecclesiæ Catholicæ, & facti sunt hæretici, vt Manichæi; aut a cōmunionē, & facti sunt Schismatici, vt donatistæ: aduersus quæ duo præcipuè hominū genera, omnia illa sunt à S. Augustino scripta, quæ in hac obseruatione afferuntur. laudat etiam Rex piorū Episcoporum prudentiam, qui in IV Concilio Carthaginensi, vt hic verè obseruatur, formulæ examinis Episcoporum interrogationem super hac re adiecerunt. neque ignorat Rex multa sæpe veterem Ecclesiam *Ἐκκλησίαν* fecisse, pro bono pacis, vt loquebantur, id est, studio conseruandæ vnitatis, & mutux communionis abrumpendæ metu. Quorum exemplū se quoque paratum esse profitetur æmulari, & sectantium pacē vestigia persequi ad aras vsque; hoc est, quantum in hodierno statu Ecclesiæ per conscientix integritatem licet. nemini enim se mortalium cedere, aut in dolore quē capit grauissimum è membrorum Ecclesiæ distractione, quam pij Patres tantopere sunt abominati, aut

in cupiditate qua tenetur, communicationem habendi cum omnibus, si posset fieri, qui membra sunt mystici corporis Domini nostri Iesu Christi. Hæc quum ita sint, existimat nihilo tamen secius Rex, iustissimam habere se causam, cur ab ijs dissentiat, qui simpliciter sine vlla penitus distinctione, aut exceptione, hanc cōmunionē sine fine urgent. Inter proprias Ecclesiæ notas hanc fatetur esse cum primis necessariam: non esse tamen autumat, veram ipsam Ecclesiæ formam & quod philosophus appellat τὸ πῶς ἵσταται. Didicit Rex è lectione Sacræ Scripturæ (neque aliter Patres olim sentiebant ad vnum omnes) veram & ἐκείνην Ecclesiæ formam esse, vt audiant oues Christi vocem sui Pastoris, & vt Sacramenta administrentur ritè & legitimè, quomodo videlicet Apostoli præuerūt, & qui illos proximè sunt secuti. Quæ hac ratione sunt institutæ Ecclesiæ, necesse est ipsas multiplici communione inter se esse deuinctas. Vniuntur in capite suo Christo, qui est fons vitæ, in quo viuunt omnes quos Pater elegit pretioso sanguine ipsius redimendos, & vita æterna gratis donandos. Vniuntur vnitæ fidei & doctrinæ, in ijs vtique capitibus, quæ sunt ad salutē necessaria: vnica enim salutaris doctrina, vnica in cælos via. Vniuntur cōiunctione animorū & vera charitate, charitatisque officijs, maxime autē precū mutuarū. Vniuntur denique spei eiusdē cōmunionē, & promissæ hæreditatis expectatione: gnati se ante iacta mundi fundamenta prædestinatos esse, (de electis loquor,) vt sint Συγκληρονόμοι καὶ σύνωμοι καὶ συμμέτοχοι τῆς ἐπαγγελίας τῆς Θεοῦ ἐν

τῷ Χριστῷ διὰ τὸ εὐαγγελίον, quod diuinus ait Apostolus. Sed addit Rex, eandem tamen Ecclesiam, si aliquod eius membrum discedat à regula fidei, pluris facturam amorem veritatis, quàm amorem vnitatis. Scit supremam legem esse in domo Dei, doctrinæ celestis sinceritatē; quam si quis relinquat, Christum relinquit, qui est ἀποσταλήθεια, Ecclesiam relinquit, εὐλογίαν καὶ ἐδξαίωμα τῆς ἀληθείας: atque eo ipso ad corpus Christi destinare pertinere. Cum huiusmodi desertoribus nec vult, nec potest verè Catholicus communicare. Τίς γὰρ συμφώνησις Χριστῷ πρὸς Βελλιάλ; Fugiet igitur horum communionem Ecclesia, & dicet cum Gregorio Nazianzeno, κρείσσον ἐμπαθεῖς ὁμονοίας ἢ εὐσεβείας διάσσειν. nec dubitauit cum eodem beato Patre, si opus fuerit, pronūtiare, esse quendam ἱερὴν πόλεμον. Quod autem in Ecclesia futura esset aliquando necessaria huiusmodi separatio, cum aliis sacrae paginae locis clare docemur; tum illa apperte declarat Spiritus sancti admonitio, non temerè profectò Ecclesiae facta: ἐξέλθετε, inquit, ἐκ Βαβυλῶνος ὁ λαός μου, ἵνα μὴ συγκοινωνήσῃτε ταῖς ἀμαρτίαις αὐτῆς. quæ iam sit illa Babylon, vnde exire populus Dei iubetur, non querit hoc loco Rex, neque super eo quicquam pronuntiat. hoc quidem res ipsa manifestissime ostendit; siue priuata quædam Ecclesia eo loci intelligitur appellatione Babylonis; siue vniuersa pars maior: eam prius fuisse legitimā Ecclesiam, cum qua pij pie communicarent: postea verò quàm longius processit eius deprauatio, iubentur pij exire, & communionē abrumpe. Vt facile sit ex his intelligere, non omnem

communione cum iis qui de nomine Christi appellantur, fidelibus esse expetendam: sed illam demum, quæ sit salua doctrinæ cœlitus reuelatæ integritate. Iam ut ad propositū accedatur propius, negat Rex accuratam illam locorū B. Augustini collectionem ad se quicquam pertinere. Omnia enim illa testimonia hoc solum euincere: Nullam spem salutis superesse iis, qui à fide Ecclesiæ Catholicæ, aut ab eiusdem cōmunionē discesserint. quod quidem & Rex, ut ante diximus, vltro concedit. Hic verò Majestas ipsius petit à te, Illustrissime Cardinalis, ut reuocare in mentē velis, atque apud te perpendere, quantum sit discrimen inter B. Augustini tempora, & hæc nostra: quàm diuerso sensu Ecclesia Catholica hodie nominetur, atque illis temporibus: quàm sit mutata Ecclesiæ facies & tota exterior forma, ut de interiore iam nihil dicamus. Nam olim quidem Ecclesia Catholica, ciuitati similis supra montem constitutæ, quæ, ut ait Christus, non potest abscondi, nullo pacto dubia erat, sed nota omnibus, perspicua, certa, ut de ea ambigere nemo sanæ mentis posset. erat enim nō ut stulti Donatistæ diditabant, nescio vbi in meridie cubans, coacta in aliquem mundi angulum: sed longè latèquē per Orbem terrarum diffusa, sub Imperatoribus florens, quorū dominatio ab Ortū ad Occasum, à Septentrione ad Meridiē porrigebatur. Erat videre Episcopos Orientis & Occidētis quotidie per Epistolas & proprios nuntios cōmunicantes, & cures postulabat sibi inuicem suppetias ferentes. Quod enim legitur in Cōstitutionib⁹ Clemētis;

omnes episcopos τὴν καθολικὴν ἐπισκοπὴν πεπιστευμένους
 atque ita esse quodāmodo œcumenicos: nunc
 attoniti legimus, nec credimus: tum autē quo-
 tidiana praxis esse verissimum ostendebat: po-
 testque hoc exemplis ex historia sexcentis facile
 demonstrari. Erant tum etiam in frequenti usu
 literæ formatae, quarum commercio & contes-
 tatione mirifice inter omnia Ecclesiæ mem-
 bra, quantumvis spatio locorum remota com-
 munitio exercebatur. Accedebāt quoties erat o-
 pus, Concilia verē Œcumenica, non vt postea
 factum aliquando videmus, nomine Œcume-
 nica, reuera ex aliquot Europæ provincijs co-
 acta. Et erat hoc temporibus priscis vinculū fir-
 missimum, quo Ecclesiæ Catholicæ mēbra om-
 nia in vnius corporis compagem deuinciebantur.
 Quod quidem corpus admodum propterea
 eminebat, in cōspectu & certa notitia omnium
 sic positum, vt ignorari ne à volentibus quidem
 posset. vna fides, vna πολιτεία, vnum Catholicæ
 corpus, partium frequens inter se visitatio, mi-
 rus omnium membrorum consensus, mira *ὑμ-*
πάθεια. Exciderat aliquis aut propter hæresin,
 aut propter schisma à communione Ecclesiæ v-
 nius: non dico vnius ē primarijs, quæ sedes erant
 quatuor patriarcharum: sed cuiusvis ē lōge mi-
 noribus? is statim vt hoc innotuerat, a commu-
 nione totius Ecclesiæ Catholicæ censebatur ex-
 clusus. nam quod exempla contrariæ obserua-
 tionis occurrunt non nulla, id vero ius commu-
 nenon erat. sed vsurpationis. Ausus erat aliquis, si-
 dem toto Orbe approbatā quamvis leuiter in-
 crustare? facile erat vel puero τὸν ἐπεροδοξοῦντι in

sua nouitate deprehendere. fure autem veritatis deprehenso, omnes Pastores totius Orbis, si erat opus commouebatur: nec semel commoti prius quiescebāt, quam de medio malum sustulissent, & securitati ouium Christi cōsuluissent. Hæc erat quondam Ecclesiæ Catholicæ designatio & felicitas: sed quæ multa sæcula nō durauit. Postea enim imperio euerso, mutataque Reip. forma, nouæ dominationes sunt exortæ, multæ, variæ moribus, linguis, legibus atque institutis inuicem distinctæ. Distractionem imperij distractio Ecclesiæ Catholicæ est secuta: & illa omnia paullatim cessarunt, quæ modò dicebamus conseruandæ vnioni, & communioni exteriori corporis Catholici apprimè seruijsse. Ex illo tempore Ecclesia Catholica, non desijt illa quidem esse: erit enim semper, neque portæ inferorum præualitura vnquam sunt aduersus ipsam: in Christo vera petra, & fide Petri cæterorumque Apostolorum fundatam: sed minus illulustris esse cepit: vt pote in plures diuisa, inter se, quoad communionem externam attinet, penitus separatas. tum autem, quod præcipue dolendū, hac dissipatione effectum, vt partibus minus esset virium, quàm fuerat toti corpori compacto ad resistendum inimico hominis, quē Christus docet, ad omnes occasiones esse intentum, vt bonam sementem lolio & zizanijs conspergat. Atque hoc euenisse quum hodie videamus oculis nostris, atque adeo manibus ipsis palpando deprehendamus: ridiculum & longe absurdissimum, disputare an fieri olim potuerit aut jam possit. Romana igitur Ecclesia, Græca,

Antiochena, Aegyptia, Abyssina, Moschouitica, & plures aliæ membra sunt, doctrina quidē & fidei sinceritate multum præstantia alia alijs, sed ramentum membra Ecclesiæ Catholicæ: cuius compages quod ad formam exteriorem, dudum est soluta. Quamobrem demiratur Ser. Rex etiam atque etiam vehementer, cum videt Ecclesias, quæ fuere quōdam integri corporis membra, ius omne vniuersitatis ad se iam trahere, appellationem Catholicæ sibi propriam facere, & reliquas omnes, quæ in vlla re à se dissentiant, aut iugum seruitutis detrectent, excludere communione sua, ac statim illas ad Catholicam nihil pertinere, audacter pronūtiare. Neque verò soli vos estis, qui hoc ius vobis vindicatis: faciūt hoc ipsum & alij. Nam quod gemens Rex dicit, multæ hodie priuatae Ecclesiæ sunt, quæ solas se credant esse illum populum *ἐκκλησίαν*, quem appellant Ecclesiam. Dares his vires quantas Romana habet, facerent quod illa iam facit, nec de cæteris clementius pronuntiarent. Quid quod multæ hodie celebrantur sectæ, quarum sectatoribus persuasissimum est, solos se aliquid in literis sacris videre, atque vt poeta ait, *ὅμῃς πεπνύσθαι, τῆς δ' ἑκκλησίας αἰσῆν*? Verum quidē est; nullo vnquā seculo de fuisse conuētiola sectariorū & *παρεστώσεως*, quæ de nomine Ecclesiæ Catholicæ se iactarent, & imperitos hoc illicio ad se attraherent: sed postremorum, ad quæ peruenimus, temporum, peculiaris hæc est calamitas insignita, quod Catholica Ecclesia, cui necessario, vel re ipsa & actu, vel voluntate saltem &

voto est

voto est adhærendum, minus est hodie, quam
 erat olim, illustre, minus exposita oculis homi-
 num, magisque ἀμφοτέρωθεν. Quo studiosius
 faciendum sibi Ser. Rex putat, ut in tanto varia-
 rum opinionum diluvio, ad montes sacræ Scri-
 pturæ se recipiat, & quod olim beatus Augusti-
 nus Donatistis consilium dabat, in verbis Chri-
 sti Ecclesiam Christi quærat. Sic & B. Chryso-
 stomus, cum alibi, tum ex professo in homilia
 in Acta xxxiii. tractans illam quæstionem, Quo
 pacto vera Ecclesia inter plures Societates quæ
 hoc sibi nomen vindicant, possit discerni: duo
 docet esse instrumenta iudicandi, & quæstionis
 huius decidendæ: primo quidem VERBUM DEI,
 tum autem antiquitatem doctrinæ, non ab ali-
 quo recentiore excogitatæ: sed ab ipso Ecclesiæ
 nascentis principio semper cognitæ. Hæc duo
 κριτήρια, Rex cum Ecclesia Anglicana, tota vo-
 luntate amplectens, pronuntiat: eam demum se
 doctrinam pro vera simul & necessaria ad salu-
 tē agnoscere, quæ è fonte Scripturæ sacræ ma-
 nans, per consensum Ecclesiæ veteris, ceu per
 canalem ad hæc tempora fuerit deriuata. Ut igitur
 huic sermoni finis imponatur, ad primam
 observationem respondet Rex, non posse eam
 sine vitio multiplici ad propositam hypothesin
 aptari. Ecclesiam enim Anglicanam adeo non
 descivisse à fide veteris Ecclesiæ Catholicæ, quā
 veneratur & suspicit, ut ne à fide quidem Ro-
 manæ Ecclesiæ descivuerit, quatenus illa cū ve-
 tere Catholica consentit. Si quæritur successio
 personarum: in promptu sunt nomina Episco-

porum, & series à primo nusquam interrupta. Si successio doctrinæ agite, periculū facite. concilium liberum date, quodque ab vnius voluntate non pendeat. parata est Ecclesia Anglicana fidei suæ roddere rationem, & rebus ipsis euincere, auctoribus reformationis hic institutæ, non fuisse propositum, nouam aliquam Ecclesiā condere, vt imperiti & maleuoli calumniantur: sed quæ erant collapsa ad formam reuocare quàm fieri posset optimam: optimam autem iudicarunt, nascenti Ecclesiæ ab Apostolis traditam, & proximis seculis vsurpata. Fatetur Rex, Ecclesiam suam à capitibus nō paucis eius fidei & disciplinæ quam hodie Romanus Pontifex probat, & omnibus tuetur viribus, discessionem fecisse; verū eam Rex & Ecclesia Anglicana non defectionem à fide veteris Catholicæ interpretantur: sed potius ad fidem Catholicam pristinam, quæ in Romana nouis inuentis fuerat multipliciter mire deformata, reuersionem, & ad Christum, vnicum Ecclesiæ suæ magistrū, conuersionem. Quare, si quis doctrina huius obseruationis fretus, inferre ex illa velit, Anglicanam Ecclesiam, quia Romanæ placita nonnulla reijcit, à veteri Catholica discessisse; non hoc illi prius Rex largietur, quàm solidis rationibus probauerit, omnia quæ à Romanis docentur, (illa præcipue quæ volunt ipsi vt necessaria ad salutē credi ab omnibus,) antiquæ Catholicæ à principio probata fuisse & sancita. hoc verò neminem posse facere, aut vnquam facturū neminem certe hætenus fecisse, tam liquidò

Regi cōstat & Ecclesię Anglicanę Antistitibus, quā Solē meridiē lucere. Postremò addit rex, magnum se quidem crimen iudicare, defectiōnem ab Ecclesia : sed huic crimini affīnē se esse, aut Ecclesiam suam, penitus pernegat: *Non enim fugimus*, aiebat eius Maiestas, *sed fugamur*. Scit verò tua illustis dignitas, vt qui optime, quā multi, quā pręstantes pietate & doctrina viri, ab annis minimū quingētis, reformationē Ecclesię in capite & mēbris, optarint : quā graues bonorum Regum ac Principum querelę sint sæpe auditę, statum Ecclesię suis temporibus lamentantium. Quid profuit? nihil enim quicquā eorum ad hanc diem videmus esse emendatum, quę correctionis egere cū primis censebantur. Quare non veretur Ecclesia Anglicana, ne cādidis æstimatorib⁹, in hac separatione, Donatistis simile quid fecisse videatur. Illi gratis & sine vlla causā Ecclesiam Catholicam, gētium cunctarum assensu comprobata, cuius neque fidē neque disciplinam culpāre poterāt, deseruerūt: Angli ab ea Ecclesia, necessitate dira cogente, secessionem fecerunt, quam innumeri populi Christiani, veram Catholicam & vniuersalem esse non concedunt, vt modestissime dicam, quamque in dogmatis fidei, & disciplinę forma multum variasse ab antiqua, multa assuisse noua vetustis, mala bonis, etiam ē vestris scriptores quā plurimi ingenue dudum sunt confessi : & verò notius iam est vniuerso mundo, quā vt possit quisquam vel negare vel etiam ignorare. Adde quod iugum Romanę seruitutis ita durū

pet aliquot retro secula erat experta Ecclesia Anglicana, nouis subinde vexationibus, & inauditis angarijs atque exactionibus supra hominū fidem cruciata, vt vel illa sola causa apud iudices non iniquos, à schismatis suspicione, & vt loquitur Augustinus de Donatistis, *iniqua dissensionu*, posse videtur ipsam liberare. Nō enim profectō Angli, à charitate fraterna animi causa dissilierunt, vt Donatistæ: neque vt x. tribus populi Iudaici, metu impendentis mali, quod nondū premebat: sed post plurium seculorum patientiā, post exātlatas inenarrabiles ærumnas: onus intollerabile, cui ferendo pares amplius non erant, neque permittebat cōscientia, subductis ceruicibus tandem excusserunt. Et vetus quidē Ecclesia, vt refractarios Donatistas ad suam communionem reuocaret, etiam commodis temporalibus Episcoporum respiciētiā, & aliorum quoque admirabili charitate prospicere solita: Romana verō Ecclesia, vt gratiam cū Anglicana redintegraret, fulmina primò bullarū, deinde vim, modò apertā, modò occultā adhibuit. proditores nefarios suscepti hic parricidij manifestos, gremio suo excepit, & nunc maxime fouet: semētīā ex eadem causa passos martiribus adscribit, & eorum innocentiam contra diuina omnia humanaque iura quotidie propugnat. Ipse Cardinalis Bellarminus (dico *in dñi & christi supmō* sed dico quod res est:) inter parricidarum patronos princeps familiam ducit. qui etiam nuper, vt Regem Serenissimum alliceret, istud miræ efficaciz ad persuadendū argumētū

adhibuit: Angliæ regnum ad Papam pertinere:
& Regem Angliæ Romani Pontificis etiam in
temporalibus esse subditum, atque feudatariū.
Omitto alias & Regis & Ecclesiæ Anglicanæ
quæ veteres quæ novas querelas, minime hoc
loco commemorandas.

II. OBSERVATIO.

PRæter absolute necessaria ad salutem, duo
sunt genera rerum quas vetus Ecclesia cre-
dit. harum alteræ vtilis ad salutem, alteræ licitæ
& non repugnantes salutem. Si quis igitur fidem
antiquorum velit amplecti, etiā istas res ipsum
oportet amplecti, & eo loco habere quo habuit
vetus Ecclesia.

RESPONSIO REGIS.

QUæ non sunt existimata à pijs Patribus
absolute ad salutem necessaria, sed tantū
vtilia aut licita, parum abest quin censerentur
ad salutem debere. erat enim equū libera vsurpa-
tio, utpote non simpliciter necessariorū. In ius-
modi rebus necessitatē aliquā hodie cōminisci,
aliquanto durius videtur. Statim enim seque-
tur necessitas vsurpandi: sicut videmus vsue-
nisse in Ecclesia Romana: quæ multa hodie ob-
servat ceu ἀπλῶς ad fidei integritatem necessa-
ria; quæ vetus Ecclesia vix norat, certe non ita
vsurpabat, tanquam plane essent necessaria.
Paucā ex multis exempla afferemus. Constat in

primitiua Ecclesia vsurpatam fuisse peccatorū confessionem, sed longe aliter quam fit hodie. nam auricularem confessionem uti apud vos exercetur, primis seculis fuisse in vsu, nemo opinor dixerit. Fatetur Rex, primos ē Patribus, qui illam instituerunt, suas habuisse rationes, cur existimarent confessionem illiusmodi, ad salutem facilius inueniendam, fore non inutilem: rem quidē absolute necessariam nō crediderūt, multo minus sacramentū: aut non omnes certe. nam de B. Chrysostomo satis liquet auriculare confessionem ipsum à suis non exegisse. Nunc ventum eō videmus, ut vix aliquid minus huic confessioni tribuatur, quàm pretioso Christi sanguini, quo sumus redempti. adeo præcisē eius absoluta quædam necessitas vrgetur. Vnde paullatim nata illa doctrina in Ecclesia Romana, de arcano confessionis nullam omnino ob causam euulgando. Quia enim credebant ad salutis portum sine hac confessione perueniri non posse, omnia eius impedimenta putarunt tollenda esse necessario. Tandem igitur eō processit hæc doctrina, ut iam Reges occidere, aut sinere occidi ne peccatum quidē esse videatur, præut si quis confessionis sigillum ruperet: quod multi vestrorum Theologorum, imprimis autē interpretes Iuris Canonici libris editis docuerunt. quinetiā hoc ipsum mihi totidem verbis Lutetiæ affirmavit Binet⁹ Iesuita, sicut mox dixisse tibi memini. Scimus etiam, neque fortasse tua illustris dignitas illud ignorat, esse alium in Gallijs Iesuitam, qui nuper ausus dicere: si Do-

minus noster Iesus Christus in terris versaretur
morti obnoxius, & aliquis sibi in confessione
dixisset, velle se illum occidere, prius quam con-
fessionē reuelaret, passurū se (horresco referēs,)
vt Christus occidatur. quę horrēda blasphemia
à quo principio fit orta vides. Sic abstinentiam à
vino delicatioribusque cibis, & statuta ieiunia,
atque xerophagias, inter res vtilēs ad salutem
facilius consequendam verus Ecclesia posuit,
neque Rex negat, si commoda adiiciatur inter-
pretatio, ex mēte ipsius primitiue Ecclesię. sed
harum obseruationem seuerius iam exigi Rex
non probat, quā eorum quę diserte literis sa-
cris continentur. Sic cęlibatus ministrorum
Ecclesię, olim laudabatur, nunc imperatur &
ceu res penitus necessaria exigitur: de quo mox
plura. Sic quum dicat Paulus se corpus suum
παράζωον & διαγωγόν, eos qui diuini Apostoli
exemplum imitantur, laudat Rex, & beatos
pronuntiat: illos vero detestatur, qui cilicia,
Laconicas *διδαστρώσεις* & id genus corporis ve-
xationes, vel vt ipsi appellant, satisfactiones aut
inter causas ponunt salutis, aut tanti certe fa-
ciunt, vt illuuiem, pædorem, scabiem, & agmē
pediculorum ex ea causa ortum, iustar perfectę
sanctimonię habeāt. Sed ex omnibus istiusmo-
di eos potissimum Rex detestatur, qui more
sacerdotum Baal corpus sibi verberibus lace-
rantes, Deum nobis fingunt humani sanguinis
auide sitientem, qualem Pagani suam Bellonā
crediderunt. Illos vero laudat Rex, qui flagellā-
dos suam vicem pretio conducunt: vt meritum

pœnarum quas alii luerunt, sibi applicetur. Ita fit vt quicquid delirent diuites, plectantur pauperes: nec sequitur nocentem pœna, sed miserū & egenum. Rex igitur vt non inuitus dabit, nemini hodie fas esse dānare ea, quę constiterit primorum seculorum Patres vñanimi consensu probasse tanquam vtilia aut licita: sic adstringi se vlla necessitate absoluta eadem vsurpandi nō patitur. Existimat enim res esse natura sua contrarias τὸ ἀναγκαῖον & τὸ ἀδιόφογον. Sed de his vberius in sequenti obseruatione.

III. OBSERVATIO.

QUum in religionis negotium nō vna species necessitatis cadat, videndum est ne vocis ambiguitate fallamur, quoties de rebus loquimur ad salutē necessarijs. Esse enim necessitatem quandam absolutam, quandam sub cōditione: aliam medii, aliā præcepti, esse etiam necessitatem credendi, quę omnes sine exceptione Christianos adstringat, & quę non omnes generatim. postremò esse necessitatem aliam actionis, aliam approbationis.

RESPONSIO REGIS.

Observationis huius doctrinam, quę varias necessitatis species docte, accurate, subtiliter & admodum copiose explicat, adeo non improbat Ser. Rex, vt contra existimet, his distinctionibus sublati multiplicem confusione in rebus

in rebus religionis exorituram. Nam quid periculosisius fingi potest, quàm si aut absolute necessaria credantur necessaria sub cōditione, aut contra nec minus utilis, ut in domo Dei omnia recte atque ordine gerantur, distinctio est, inter alias necessitatis species, quæ hic explicatur. Ne in exēplis quidē appositis, quicquam Regi obseruatū, quod admodū improbaret. Verissimè autem scriptum esse in explicatione τῶν ἀπλῶς ἀναγκαίων Rex arbitrat, rerum absolute necessariarū ad salutem, non magnum esse numerū. Quare existimat eius Maiestas, nullam ad inuendam cōcordiam breuiorem viam fore, quàm si diligenter separentur necessaria à non necessariis. & ut de necessariis cōueniat omnis opera infumatur: in non necessariis, libertati Christianæ locus detur. Simpliciter necessaria Rex appellat, quæ vel expresse verbū Dei precipit credenda faciendāue: vel ex verbo Dei necessariā consequentiā vetus Ecclesia elicit. At quæ ex institutione hominum præter verbum Dei, quamuis pie & prudēter, pro tempore in vsum Ecclesiæ sunt recepta, mutari, molli, antiquari posse existimat, & quod Pius 11. de celibatū clericorū dicebat, bono olim iure sancitū, meliorem nunciri antiquatum, id in genere de plerisque observationibus Ecclesiasticis, extra verbū Dei introductis, posse vsurpari Rex credit. Si ad decidēdas hodiernas controuersias hæc distinctio adhiberetur, & ius diuinum à positiuo cādide separaretur, non videtur de iis que sunt absolute necessaria, inter pios & moderatos viros longē

ga aut acris contentio futura. nam & pauca illa sūt, vt modò dicebamus, & fere ex æquo omnibus probantur, qui se Christianos dici postulāt. Atque istam distinctionem Sereniss. Rex tanti putat esse momenti ad minuendas controuersias, quæ hodie Ecclesiam Deit antopere exercent, vt omnium pacis studiosorum iudicet officium esse, diligētissime hanc explicare, docere vrgere. Nunc de exemplis nonnullis, quæ in hac obseruatione proponuntur, quædam dicemus. Inter absolute necessaria, nō quidē simpliciter, verūm ex institutione diuina, ponitur baptism⁹ infantium, *quem nos, inquis, ad hanc speciem necessitatis referimus*: deinde subiicitur locus B. Augustini, quo negatur præcise, posse infantes non baptizatos seruari. Hic primūm Rex proficitur necessitatem baptismi ex institutione diuina, nō minus aut sibi, aut Ecclesiæ Anglicanæ probari, quàm vobis. Non astringit quidem Ecclesia Anglicana gratiam Dei mediis, quod ne per doctrinā quidem Scholasticorū aliquot è melioribus licet: quia tamen hanc Deus rationem ordinariā ad peccatorū remissionem impetrādā, in Ecclesia sua instituit, & eos qui renati non fuerint ex aqua & Spiritu, intrare posse regnum cælorum, Christus ipse negat: sedulo hic prouisum est legibus Ecclesiasticis, vt quouis tēpore & loco baptizandi infantes suos parentibus esset facultas. Quod igitur de nascente olim Ecclesia dixit Tertulianus, baptizare Episcopū, presbyterum, diaconum: postremò etiam laicis ius esse, in extremæ videlicet necessitatis casus, hoc ipsum in Ecclesia Anglicana, quod ad Epif-

copos præbyteros & diaconos hodieque seruantur, sine vlla vel loci, vel temporis rigida & penitus inuiolabili obseruatione. laicorum vero baptismum, aut feminarum, vt fieri legibus suis vetat, sic factum ex legitima formula quodammodo non improbat, baptismum esse pronuntians, etsi non legitime administratum. Serenissimus vero Rex, tanti hoc sacramentum facit, vt quosdam in Scotia ministros, quum nescio quas nouæ disciplinæ ordinationes prætexerēt, quominus moribundos infantes rogati à parentibus baptizarent, metu supplicii iniecto ad officium compulerit, minatus extrema nisi parent. Itaque verba Augustini, quæ non baptizatos vita æterna priuant præcisē, si de via ordinaria intelligantur, quam solam Christus nos docuit, nihil Rex habet, quod illi sententiæ opponat: sin autem negatur simpliciter, posse Deū opt. max. *τὸν ἀποστόλον* seruare, diritatem huius sententiæ & Rex & Ecclesia Anglicana abominantes, Augustinum durum & *ἄσπον* infantū patrem fuisse pronuntiant. Omnino vtrumque extremum pari diligentia Rex fugiendum autumat: ne aut Dei manum abbreviemus, & infinitæ bonitati ipsius iniuriam faciamus, si rigidā hanc sententiā amplectamur, aut baptismū ponētes, cū nōnullis, inter ea quæ adsint vel absint, nō multū interest, sacramētum à Deo institutū pro re leui ducere videamur. Magnus sane vir fuit Augustinus, pietate & doctrina admirabilis: cuius tamen proprias opiniones, neq; Rex pro dogmatis fidei admittit, neq; vos admittitis. Nam verbi gratia, S. Eucharistiam infantibus

ad salutem esse necessariam, non minus quàm baptismum credidit post Innocentium primū Augustinus, & multis suorum scriptorum locis pronunciauit. vos nō creditis, neque acceptam à vobis doctrinam Ecclesia Anglicana mutauit. Inter illa quæ necessitatem actionis certis personis imponunt, coniugium numeratur, *Si quis sobolem tollere voluerit*, inquis. Rursus autē paulo post, vbi exponitur necessitas approbationis, recēsetur electio vitæ in virginitate aut celibatu degenda, Quæ Rex quum legeret, non reprehendit ille quidem: sed potuisse tamen aliquid ad vtrumque exemplum commodè adijci, indicauit. Nam, e priore exemplo videtur sequi nullam esse aliam matrimonii causam necessariam, præter spē sobolis, atqui expressis verbis docemur à Paulo Apostolo, etiam illos teneri nuptias cogitare, quibus non contigerit continentię donū. *εἰ δὲ ἐχρηστώσῃ, αἰτ, γαμήτωσαν* Can. Nō est exigui momēti hæc adiectio. Remedii enim necessarii & regulæ Apostolicę contēptus, quibus quantisque flagitiis quotidie in Ecclesia Romana occasionem prabeat, ignorat nemo. Studium igitur viuendi in virginitate aut celibatu, in continentibus, mirum in modum sibi probari Rex profitetur: & quum singulari Dei beneficio, sacrę literę familiarius sint eius Maiestati notę, quàm vulgo soleant esse Principibus, non fugit ipsum, quid Paulus de re tota pronūtiat, quæ eiusmodi vitę in vtroque Fœdere legantur exempla, quæ præmia τοῖς ἐχρηστώσασιν sint proposita. Sed quod Theologi apud vos passim docent, præsertim autem Iuris

Canonici doctores : concubinatum, scortationem, & scæda alia, ἀσφ ἄρρητα ἀμείνω, tolerabiliora esse in ministris Ecclesiæ, quàm legitimas nuptias, & πῶς ἐν πᾶσι ἀμείνων τοῖς πῶς: id verò Rex facinus esse iudicat plane detestabile, Dei atq; hominum odio dignissimum. Opponit Rex omnibus omnium Sophistarum cavillis, atque adeo omni humanum auctoritati, Spiritus Sancti oraculum, per Apostolos pronuntiatum, κρείσσον γὰρ ἡμεῖς ἢ τοὺς ἄλλους. Quemadmodum autem magno belli duci antiquior cura esse debet, ne damnum aut cladem ipse accipiat, quàm vt hosti inferat: sic in electione vitæ aut conjugatæ, aut cælibis, pijs omnibus ante omnia cauendum esse Rex affirmat, ne jus diuinum migrent: tum autem, si cui est facultas, vtatur sane bono naturæ. Scimus vsu tritam esse calūniam, non esse Ecclesiam Anglicanam legitimā Ecclesiam, quia eiusmodi votorum vsus hic nullus. Quid tum verò si non fiat votum, quū res ipsa non ignoretur? Sunt enim multi inter Episcopos, & alios Ecclesiæ Pastores, qui sine ostentatione voti nuptijs abstineant, & sine vlla fabula, sine vlllo sinistro rumore, caste sanctæque vitā exigant Ipsa quoque monachorū cœnobîa Rex optimus & pietatis studiosissimus soluturus omnino nō fuit, (certe non omnia) vt sæpe affirmantem audiui, si inuenisset integra, & primæ institutionis legem seruantiâ. Optaret vero Sereniss. Rex etiam atque etiam, vt Patribus Tridentinis, qui ne precibus quidem summorum Regum & Principum adduci potuerunt,

quò publicè honestati hac in parte consulerent, venisset in mentem, à quo principio hodierna doctrina sit profecta. nam quum initio cœlibatus inter vtilia instituta poneretur & consilia, postea sunt adiecta vota, postremò ad hanc absolutam necessitatem est peruentum, quæ hodie apud vos obtinet, lege Dei valere iussa, & pedibus mortalium indignissime conculcata. Quod in fine observationis huius additur male illos affirmare, fidem se & disciplinam eandem cum veteri Catholica retinere, quia alia eorum probent, alia improbent, quæ prisca Ecclesia ad salutem credidit necessaria, sicut sub diuersa specie necessitatis, id quò spectet, satis Rex intelligit. Respondet igitur: nolle se quidem Ecclesiam suam, vt speculũ sine macula, & quasi perfectè pulchram sine ruga, sine nequo prædicare: hunc enim Pharisaismum se suosque aliis lubenter relinquere: illud tamen certò, clare & liquidò sibi constare, si notæ *ἱστορίαι* quærantur, & verè necessaria ad salutem spectentur, aut etiam ad decorem Ecclesiæ, nullam in Orbe terrarum (Deo vni sit laus & gloria) inuentum iri, quæ propius ad fidem, aut speciem antiquæ Catholicæ accedat. nullam excipere se, ne Romanam quidem: quæ nouis inuentis, cum ad augendam superstitionem, tum ad stabiliendam dominationem suam, & Imperium in Reges & Principes, & populos terræ vniuersos excogitatis, fidē & disciplinam veteris Catholicæ, varie interpolauit, varie mutauit, & à primitiua Ecclesiæ puritate atque simplicitate in multis quàm lon-

gissimè recessit.

III. OBSERVATIO.

QVando quæritur de fide antiquæ Ecclesiæ, sunt qui vno aut, altero seculo, post iacta Ecclesiæ fundamēta, antiquitatē circumscribāt, æquum verò esse, v̄t ad disceptandas hodiernas controuersias, id potissimum tempus sumatur, de quo inter contententes constabit, nō solum veram fuisse Ecclesiam, temporis illius Ecclesiā, sed etiam tunc maxime floruisse, & splendorem illum obtinuisse, quæ ipsi tot prophetarum oracula erant pollicita. Id autem esse tempus, quo prima quatuor Concilia Oecuménica includuntur, à Constantino Imperatore ad Marcianum atque hoc vel propterea æquissimum esse, quia primorum seculorum paucissima exstant monumēta, illius verò temporis, quo præcipue Ecclesia florebat, longe plurima: vt facile ex eius ætatis Patribus & eorum scriptis, fides ac disciplina veteris Catholicæ possit agnosci.

RESPONSIO REGIS.

Hoc postulatum parum illis æquum videbitur, qui vniuersam Ecclesiæ primitiuarum historiam, Actuum Apostolicorum, diuino illo quidem, sed tamen vnico libello, volunt contineri. Ab horū sententia longe abest æquissimus prudētissimusque Rex; qui in Epistola monitoria sua, quanti faceret Patres, etiam quanti aut

quinti sæculi, ingenue declaravit, nec dubitat Rex cum B. Augustino pronuntiare, quod probatum fuerit Ecclesiam à prima sua origine, ad illa vsque tempora seruasse, id tanquam impium velle reijcere, insolentissimæ esse insanie. Tres enim recti notas Vincentij Lirinensis, à principio, vbique & semper, dudum amplecti se, vere nec simulate eius Maiestas est professæ. Rex igitur & Ecclesia Anglicana, quatuor prima Concilia Oecumenica quum admittant, eo ipso satis declarant, verè ac legitimæ Ecclesiæ tempus, non includere se vno aut altero demum seculo, verum multo longius producere, & Marciani Imperatoris, sub quo Chalcedonense concilium est celebratum, tempus complecti. Sed quod in hac observatione pluris videntur æstimari tempora post Constantinum, quàm anteriora: id verò Sereniss. Rex valde miratur, & omnino haut probat. Fatetur Rex quarti seculi Ecclesiam gloria, splendore, opibus ac doctorum virorum copia, magis quam priora floruisse: at rectitudine fidei, quam *orthodoxiar* dicunt, & incorruptæ disciplinæ sinceritate, aut parem, aut etiam superiorem priorum seculorum Ecclesiæ fuisse, dubitare posse putat Rex mortalium neminem. Leguntur passim apud pios patres quarti seculi, Basilium, Nazianzenum, Hieronymum, Chrysostomum, Augustinum, alios, grauissimæ querelæ de vitijs Ecclesiarum suarum, & varijs deprauationibus: neque potest ambigi, quò longius ab origine prima recedebatur, eò etiam longius à primæua puritate & simplicitate esse recessum.

recessum. Quare si de verrenda & mundanda domo Dei serio cogitatur, cur ad Apostolica tempora, aut Apostolicis proxima non potissimum respiciatur? Verum quidem est, partem multo maximam illius temporis in tenebris situ & squallore, propter continuas persecutiones, piis esse transactam: sed videamus etiam atque etiam, ne in hac quoque re, melius sit ire ad domum luctus, quam ad domum conuiuij. Paupertas & calamitas bonæ mētis sorores, audiunt, diuitiæ & gloria non eādem famam obtinent. Quod si non adeo multi eorum temporum scriptores ad nostram ætatē peruenerunt: at peruenerunt tamen nonnulli, quorum ratio habeatur dignissimi. Vel vnicus certe Christi martyr sanctissimus Cyprianus, primitiuæ Ecclesiæ *πρωτεύων* & disciplinam totā melius nos docuerit, quā multi alij, qui in quaresculo vixerunt. Summa igitur regiæ responsionis ad hanc obseruationem est: facile passuram ipsius Maiestatem, vt è Patrum scriptis quarti aut etiam quinti seculi argumenta afferantur, ea tamen lege atque conditione, vt pro vere antiquis, & ad salutem necessariis illa sint admittenda, quæ non tunc primum fuerint nata, sed quæ ab origine prima nascentis Ecclesiæ obseruatione continua, ad illos peruenisse constiterit.

V. OBSERVATIO.

CUm vnanimis Patrum consensus quaritur, sunt qui tunc de eo satis liquere con-

E

tendāt, quando res eadem totidem verbis apud omnes Patres reperitur: quorum sententia, quā sit palam iniqua, æquius fuerit ad consensum Patrum cognoscendum, duas hasce regulas adhiberi, Prior est, vt tunc existimetur satis probatus esse consensus patrum, quando eminentissimi quique singularum nationum, in re aliquius affirmatione consenserint, neque illis sese quisquam opposuerit, qui quidem orthodoxus censeretur. Sic B. Augustinus contra Donatistas, postquam è prioribus scriptoribus insigniores vñdecim laudasset; Patres Cōsiliū Ephesini, postquam contra Nestorium decem protulissent, de vnanimi consensu Ecclesiæ prioris fidem se abundè fecisse crediderunt; Posterior regula hæc est: Quando Patres non vt Doctores loquuntur, neque dicunt hoc aut illud sic esse credendum, aut sic faciendum: sed tanquam testes eorum quæ suis temporibus Ecclesia vniuersalis credebat, aut faciebat, dicunt hanc esse fidem aut praxin Ecclesiæ Catholicæ per totū orbem terrarum: tunc eum honorem illis habendum esse, vt ad vnanimem consensum Ecclesiæ, eiusmodi affirmatio satis credatur valere.

REGIS RESPONSIO.

E St quidem æquissima postulatio, vt de cōmuni consensu partium hodie contendendum, ratio ineatur vtiliter vtendi veterum Patrum auctoritate. Nam primitiuę Ecclesiæ testimonio & pondere sublato, controuersias ho-

diernas finem nunquam, τὸ κατ' ἀνθρώπους accepturas, neque vlla disputatione fore terminandas, vltro Sereniss. Rex agnoscit. Vt igitur conueniat inter vtrosque, quid & quantum Patribus sittribuendum, & quatenus eorum auctoritati sit deferendum, non fuerit inutile certas regulas de mutuo partium consensu componi, quæ modum rei præscribant. Inter alios plures ei proposito vtiles ac necessarios canones, etiã duobus hisce locum posse concedi, Rex autumat. Sed quoniam hodie non de ceremoniis cōtrouertitur, aut aliis mediocris momenti rebus; verùm de fidei articulis aliquot, & de dogmatis ad salutem pertinentibus, multo sollicitius dādam esse operam Rex iudicat, vt ante omnia de hac regula inter omnes conueniat: Dogmata fidei, & quicquid ad salutem necessarium mereatur credi, è sola Scriptura sacra peti debere: neque à quorumuis mortalium auctoritate pēdere: sed è verbo Dei duntaxat, quo suam ipse nobis voluntatem per spiritum Sanctum declarauit. Patribus enim & Ecclesiæ veteri, fidei articulos eliciendi è Sacra Scriptura, & explicandi ius fuisse: nouos articulos comminiscendi nullum ius fuisse. Isto posito fundamento & τῇ θεοπνεύσῳ pagine sua Maiestas manebit facta tecta; & piis Patribus quæ debetur reuerentia præstabitur. Hoc voluisse omnes veteris Ecclesiæ doctores, facile potest ex eorum scriptis demonstrari. Nam quid in eorum libris occurrit frequentius quàm hæc verba? ὅτι διδάσκουσιν ἐν ᾧ ὡς γράφειν: quæ docentur in Ecclesia Dei, è verbo

Dei peti debent. aut hæc, ἡ διένευσις ἡμῶν διατα-
σάτω χάρις, iudiciū de controuersis in causa re-
ligionis penes scripturā esto. Aut cui iam nota
non sunt verba aurea Basilii Magni, in libello
De fide: πανεὶ ἐκπῶσις πίστεως, καὶ καθήκουστος καλῶ-
ροῖα, ἢ ἀντιτεῖν π τῶν γεγραμμένων, ἢ ἐπιτάλῃ τῶν
μὴ γεγραμμένων. τὸ Κυεῖν ἡμῶν Ἰησοῦ Χριστοῦ εἰπόντος, τὰ
ἐμὰ πρῶτα τῆς ἐμῆς φωνῆς ἀκούει. Et ad propositas
quidem observationes hæc dicta sunt.

Sequuntur iam quatuor ἐπιστάσεις. Accedens
enim tua illustris dignitas ad hypothesein, vt e-
uincat non credere Serenifs. Regem, quæ olim
Catholica Ecclesia credidit, quatuor id argu-
mentis instituit demonstrare, ex iis rebus peti-
tis, quæ ad exteriorem Dei cultum pertinent,
siue liturgiam, & praxin quotidianam. Cur au-
tem has potissimum ἐπιστάσεις afferat, hanc ra-
tionem postea reddit, quia si de his esset conuē-
tum, de cæteris futura sit facilis contentio. Op-
taret equidem Regia Maiestas, illustrissime
Cardinalis, posset hoc sperari: sed recordanti
ipsi & animo reputanti, quid illud sit quod ho-
die à vestris scriptoribus præcipua cura & acrio-
re contentione vrgeatur, non magna illi con-
cordiæ spes apparet, ne tum quidem, si de
istis quatuor capitibus à te propositis fuerit
conuentum. non enim iam de istis, aut om-
nino de vlllo religioni Christianæ capite, a-
crius disputatur, quàm de Romani Pontificis
imperio. Is vnus est hodie fidei articulus, à quo
cæteri omnes pendent. Quid igitur bonæ spei
restat, nisi in illius bonitate & misericordia, cu-

ius vnius est malis Ecclesiæ medicinam facere?
In illo speremus, etiam cōtra spem. αὐτὸς ποιεῖ.
Vt redeamus in lineam, quatuor ἐνστάσεις contra
liturgiam Ecclesiæ Anglicanæ alata, sunt istæ.

- I. In sacro sancta Eucharistia realem Christi
presentiam non credit.
- II. Doctrinam de sacrificio Ecclesiæ Chri-
stianæ respuit.
- III. Non precatur pro mortuis.
- IV. Inuocationem Sanctorum, qui in cœlis
sunt damnat.

Ad hæc quatuor paucis respondet Rex.

Ad primam ἐνστάσιν de presentia reali.

SI in sacrosanctis religionis Christianæ my-
steriis, nihil credere fideles existimādi sunt,
nisi cuius rationes omnes habent perspectas, &
modū tenent: nā multa Christiani reperientur
non credere, quæ ipsi tamen firmissima se fide
credere non dubitant. Christum Dominum no-
strum Dei Patris filium esse, ante omnia sæcula
à Patre generatum: eundem quum sit verus
Deus, carnem humanam assumpsisse in utero
B. Virgininis, ex illa natum esse, virginitate ma-
tris illęsa: diuinam naturam humanā in eandem
hypostasim vnijse: hæc, inquā, & similia his plu-
credere se omnes profitentur Christiani. à qui-
bus tamen si modum quæras, quo ista sunt facta,
aliud fidem esse Theologicam dicent, aliud hu-
manam scientiam: pieque vsurpabunt Galeni,
parum alioquin idonei pietatis magistri, verba
eximia è libro xv. De vsu partium. τὸ ὅπως ἐγένετο
τὸτο, καὶ ὅτι χεῖρ ἐκ τῆς ζυτῆς, ἀναιδυντοῦ φερεθήσεται
ἐκ τῆς σῆς ἀδελφίας, ἐκ τῆς τοῦ διμυρῆς δυνάμεως. Pa-

tres verò quoties nos dehortentur à quæſtione
 ῥεῖς, & curiositate modi explicandi in diuinis
 myſteriis, ſi aggrediar hic adnotare, longum
 fecero. Gregorij Nazianzeni verba ſunt tibi
 nota in oratione priore, De Theologia : ἀκύνεις
 ῥήνυσιν, τὸ ὅπως μὴ περιθράζῃς, ἀκύνεις τὸ πνεῦμα τὸ ἁγίον
 ἐν τῷ πατρὶ, τὸ ὅπως μὴ πελυθεργῶναι. & alio
 loco idem : Θεὸς ῥήνυσιν σιωπῇ πᾶσι, μέγα σοὶ τὸ
 μαθεῖν, ὅτι γέμῃς. τὸ δὲ πῶς, ἔδ' ἀγγέλοις ἐποῖν,
 μὴ ὅτι γὰρ σοί, συγχωρῶμεν. Erat Gregorio res
 cum Arrianis peruicaciſſimis hæreticis : quo-
 rum impiæ curiositati, non ſubtilitate diſputā-
 di conatur ſatisfacere. ſed tanti arcani modum
 & rationē quæri vetans, ſilentium in illis indicit.
 Hac pia moderatione ſi Rex & Eccleſia Angli-
 cana in ſacroſancto Eucharistiæ myſterio vtū-
 tur, quæ, obſecro, inuidia eſt? Legimus in Euā-
 geliis, Dominū noſtrū cum hoc ſacramentū in-
 ſtituebat, panē ſumſiſſe, & dixiſſe *Hoc eſt corpus
 meum* : quomodo panis corpus ſuum eſſet, ne
 verbulo quidē vno explicuiſſe Chriſtū legimus.
 Quod legit Eccleſia Anglicana hoc pie credit:
 quod nō legit, pari pietate nō inquit. Myſte-
 riū iſtud magnū eſſe, humano ingenio incōpre-
 hēſibile, ac multo magis inenarrabile, fatetur &
 docet: de efficacia illius ſentit quā auguſtiſſime:
 ad ſacrā menſam accelluros conſcientiæ omnes
 ſcrutari reſeſſus, & peccata conſiteri, ſvtique a-
 pud Deum, ſed & ſi opus fuerit, apud preſbyte-
 rum, iubet; accedentes, vt ad omnem humilitatē
 & deuotionem ſe componant, ſedulo monet:
 genibus flexis communionem corporis Chriſti
 accipit: nec ſolum in communi conuentu panē

myſticum fidelibus diuidit, ſed etiam morientibus hoc viaticum, vt appellant Patres concilii Niceni, & tota antiquitas, adminiſtrat: poſtremo quum ab omni curioſitate velit Rex ſuorum ingenia abſtinere, quæcunque tamen pii Patres primorum ſeculorum, ad commédationem ineffabilis myſterii dixerunt, ea ipſe admittit: Patrum etiam verba, μεταβολικῶς μεταποιήσιν, μετασχημασίῃ, & ſimilia, ex mente ipſorum ſi accipiãtur & exponantur, non reiicit. Hæc Regis & Eccleſiæ Anglicanæ doctrina, ſi vobis non ſatisfacit: nempe illud reſtat, vt Tranſubſtantiationis dogma, quò vobis placatis poſſit vti approbet. Iſtud verò non eſt rei veritatem pie credere: ſed importuna curioſitate modum decernere: quod Rex cum Eccleſia ſua nunquam eſt factururus, nūquam probaturus. Miratur verò Sereniſſimus Rex, quum fateatur tua illuſtris dignitas, non *μεγαλυνούμενος* quærere vos, vt credatur Tranſubſtantiatione, ſed vt de præſentiæ veritate ne dubitetur: Eccleſiam Anglicanam, quæ toties id ſe credere publicis ſcriptis eſt teſtata, necdū vobis feciſſe ſatis. Vt igitur certo cognoſcas, quid in hac Eccleſia ſuper illa re credatur, quid doceatur, deſcribam hic reuerendiſſimi viri Domini Epifcopi Elienſis locum integrum, e libro quẽ paucos ante menſes aduerſus Cardinalem Belarminum edidit. Sic ille capite primo. *Quod Cardinalem non laet, niſi volentem & ultro, dixit Chriſtus, hoc eſt corpus meū: non, Hoc modo hoc eſt corpus meum. Nobis autem vobiſcum de obiecto conuenit, de modo liſ omnis eſt. De Hoc eſt, fide firma tene-*

mus, quod sit: de Hoc modo est (nempe transubstantiato in corpus pane) de modo quo fiat, ut sit Per siue In, siue Cum, siue Sub, siue Trans nullum inibi Verbum est. Et quia Verbum nullum, merito à fide ablegamus procul: inter scita scholæ, fortasse, inter fidei articulos non ponimus. Quod dixisse olim fertur Durandus, neutiquā nobis displicet, Verbum audimus, motum sentimus, modum nescimus, præsentiam credimus. Præsentiam, inquam, credimus, nec minus quam vos veram. De modo præsentia nihil temere definimus, addo nec anxie inquirimus, non magis quam in baptismo nostro, quomodo abluit nos sanguis Christi: non magis quam in Christi incarnatione, quomodo natura diuina humana in eandem hypostasim uniatur. Inter mysteria ducimus (& quidem mysterium est Eucharistia ipsa) cuius quod reliquum est debet igne absumi, id est, ut eleganter in primis Patres, fide adorari, non ratione discuti. Hæc fides Regis, hæc fides Ecclesiæ Anglicanæ. Quæ ut breui compendio rem omnem complectar, in cœna Domini, realiter participem se fieri credit corporis & sanguinis Christi, ut Patres Græci dicunt, & quod Bellarminus ipse fatetur, spiritualiter. Per fidem enim Christum apprehendunt & manducant: creduntque nullum aliud manducationis genus ad salutem utile esse posse, quod & omnes vestri semper falsi sunt.

Ad II. *tractu de sacrificio in Ecclesia Christiana.*

Veteris Ecclesiæ Patres sacrificium in religione Christiana vnum agnouisse, quod in locū successisset omniū legis Mosaicæ sacrificiorū, neque ignorat Rex, neque negat. Sed hoc sacrificiū nihil esse aliud contendit, nisi cōmemora;

morationem eius, quod semel in cruce Christus Patri suo obtulit. Quare B. Chrysostomus, quo frequētius nemo huius sacrificii meminit, in nonū capit. Epistolæ ad Hebræos, postquam *θυσίαν* nominasset, continuo subiungit, siue explicationis, siue etiā correctionis loco, *μᾶλλον ὅ ἀνάμνησιν θυσίας* illa locutio *μᾶλλον ὅ* quam vim habeat, scis ipse omnium optime. Sepe autē Ecclesia Anglicana professæ est, de verbo nullam se litem moturam, si modo impetrari à vobis posset, ut pristina fide in integrum restituta, quæ contra usum veteris Ecclesiæ à vobis vsurpantur, tolleretur. Nam Eucharistiæ celebrationem sine communicantibus, & vniuersam illam priuatarum missarum nundinationem, multis etiam vestrorum Theologis damnatam, certum est à peruersa doctrina de hoc sacrificio originem habuisse. Quod autem ad extrahendas defunctorum animas è flammis purgatorii sacrificia missarum exiguntur, & quidem sæpe repetita, otiosorum, hominum & simplicitate populorum ad quæstum suum impie abutentium, delirium esse, Rex nō dubitat. Tollantur hi & similes his alij crassi foedique abusus, qui apud vos obtinent: ab Ecclesia Anglicana, quæ in sua liturgia expressam sacrificij mentionem habet, facile impetraueris, ut in veteris Ecclesiæ usu acquiescat. Quamobrem Serenissimus Rex quum nuper ei essent narrata quæ paulo ante in celeberrimo conuentu Dominicanorum docte fuerant à te disputata, de duplici sacrificio, expiationis nempe, & commemorationis, siue religionis, sibi quoque

idem probari, multis audientibus pronuntiavit, & nunc etiam ut hoc ipsum tibi confirmarem eius Maiestas me iussit.

Ad III. versum de precibus pro mortuis.

Confuetudinem esse vestutissimam, ut in publicis Ecclesiarum precibus commemoratio fiat defunctorum, & quies illis petatur à Deo, qui in pace Ecclesiarum sunt mortui, pauci hodie ignorant, nedum Serenissimum Regem hoc fugiat. Eum morem à charitatis vehementia esse profectum, non videtur ambigendum. Sed & fidem suam, de futura resurrectione, vetus Ecclesia eo pacto approbavit. Hunc ritum Ecclesia Anglicana etsi non damnat in primis seculis, hodie tamen sibi non putat retinendum, idque propter causas & plurimas & gravissimas nonnullas de multis hic attingemus. Prima omnium est, quia sine ullo præcepto supremi in Ecclesia sua Legislatoris Christi, primo fuisse eum morem introductum, habet persuasissimum: neque hactenus contrarium huius à vestris Doctoribus potuit demonstrari. Quare etsi non tantum sibi sumit Rex, sicut in Monitoria sua dudum est protestatus, ut veteris Ecclesiarum usu probatum institutum ausit condemnare: nihil tamen dubitat eius maiestas, Ecclesiam suam nulla eius necessitate hodie teneri. Nam quicquid est, quod hac in parte veteres fideles fecerunt: id omne Rex ad illud caput utilium vel licitorum refert, de quo in secunda observatione est dictum: ad ea certe quæ absolute necessaria sunt, nulla ratione persuadebitur, hunc ritum pertinere.

Vnde enim illa necessitas? non ex lege Dei, qui hoc nunquam imperavit. Si ab eo fonte non est, nulla profectò est. Posuimus enim, sola illa ad salutem necessaria existimari debere, quæ aut expressè cōtinentur in verbo diuino, aut necessaria consecutione inde fuerint deducta, quorū neutrum hic locum habet. ea verò quæ vetus Ecclesia, sine vlla necessitate aut credidit aut fecit, libera hodieque nobis esse debere, antea dictum est. Secunda ratio est, quòd licet fateatur Rex hanc consuetudinem antiquissimos auctores habuisse, à principio tamen & temporibus Apostolicis, vnde omnis Ecclesiæ antiquitas repeti debet, sic factum esse, nemo ad hanc diem potuit probare. Accedit quod preces, quæ olim fiebant, & modo & sine multum ab iis differabant, quæ sunt hodie & docentur. Tertiam rationem adiicit Rex, quod vbi semel preces pro defunctis admittæ fuerunt in Ecclesiæ ritus, mox pudendorum errorum, & plus quam anilium superstitionum caterva ingens agmine facto in Ecclesiam irrupit. Indicent vero æstimatores æqui, vtris pòtius Catholicorum appellatio sit denegāda, Rogine & subditis ipsius, qui rem nulla necessitate introductā, propter insecutos errores desinunt vsurpare, aut iam sibi licitam putare: an vestris hominibus, qui omnes superiorū seculorū, quamuis fœdos & perniciosos errores, sophisticis cauillis mira pertinacia defendere malunt, quàm corrigere.

Ad IV. ὑπόμνημα, de inuocatione Sanctorum.

DE Sanctorum inuocatione Ser. Rex dicit idē, quod de precibus pro defunctis. A te-

huius principio, quod nemo iam nescit. res postea magnū incrementū cepit. donec tandē eō ventū, ut superiorib⁹ seculis (atque utinā nunc quoque multis in locis non idem fieret) populus Christianus plus fiduciæ, & præsentis auxilij spem certiorē poneret in Sanctis, quā in ipso, nefas dictū, Christo Seruatore, qui ὡς μορφή Θεῶν ἀρχῶν, ut salutem hominibus, hostibus suis pararet, ἑαυτὸν ἐκένωσε, μορφῇ δούλου λαβὼν, ὃ ἐταπείνωσεν ἑαυτὸν ὑποκύψας ἵππικος μέχρι θανάτου, θανάτου ὃ παύρι. Et quum Dominus ipse, quæ est illius omnem superans admirationem bonitas & clementia, in Evangelio, suauissimæ dulcedinis verbis ad se miseros peccatores, vocet, *Venite ad me*, inquit, *omnes qui laboratis & onerati estis, & ego reficiam vos*. extitere tamē peruerse ingeniosi doctores, qui inuitationem adeo blandam inutilem conarentur reddere: & vnicū apud Deum Patrem humani generis Advocatum, terribilem & semper immitem depingentes, miseris hominibus persuaderent, nullum ad Christum sine intercessione plurium advocatorum aditum patere. Fuerunt etiam qui palā docerent, iustitiæ seueritatem Christum sibi seruasse, gratiā & misericordiam beatissimæ Virgini reliquisse. Tum autem officia inter Sanctos & curationes solertia admirabili, ne dicam superstitione detestabili, sunt distributæ. Et olim quidem suffragia illorum, duntaxat expetebantur, ut sua gratia apud Deum intercederent: postea verò etiam libris repletus est mundus, qui proprie pertinerēt ad huius illiusve Sancti cul-

tum, & formulas docerent petendi ab eo necessaria. Igitur in locum Psalmorum, quē libellum diuinum omnes olim Christiani, viri feminæ, senes iuuenes, diuites pauperes, docti indocti, perpetuo in ore & manibus habebant, successerunt Hora B. Virginis, & Legendæ, sine potius fabulæ vt plurimum, impiæ ac deliræ, (de veris martyrum historiis non loquor) & similes quilibet. Parum est quod excusatus est de manibus fidelium tam diuinus, tam necessarius libellus: nisi esset repertus, qui ad honorem B. Virginis Psalmos omnes transferret, omnia illi tribuens, quasi inter Deum & hominem *κλίστω* & *κτίσω* nihil intereisset, quæ spiritu prophetico de vnico filio Dei fuerant prædicta. Serenissimus Rex gloriosissimam Virginem Matrem Dei, prædicat beatissimā, neque dubitat in supremū honoris gradum esse euectam, qui humanæ creaturæ à Deo creatore potuit tribui, per placet etiā illi quod Ecclesia Anglicana memoriam B. Virginis certis anni diebus concelebrat. sed nullis technis ab eius Maiestate hodierni Sophistæ expresserint, vt quod diximus B. Virginis psalterium approbet, aut omnino ferat, nam Cardinalem Bellarminum, qui nuper defendit, ne vestris quidem hominibus, qui sensum pietatis nō plane exuerint, probari, Sereniss. Rex autumat. Hisce morbis intercutibus quum letaliter prope iam Ecclesia Romana laboret, demiratus est Rex, quod in tua, Illustrissime Cardinalis, epistola legit, inuocationem Sanctorum quæ hodie à vestris vsurpatur, primitiua Ecclesiæ temporis-

bus, fuisse in usu. Breuiter igitur respondet: primis nascentis Ecclesiæ temporibus, alium præter vnum Deum opt. max. fuisse orari solitum, demonstrari omnino haut posse, nullum eiusrei præceptum extare in verbo Dei, nullum penitus exempli alicuius vestigium. Solus Deus adorebatur, solus orabatur per filium suum vnigenitum, Mediatorem inter Deum atque homines vnicum, solum, *μονώτατον*. postea morem esse introductum orandi ad memorias Martyrum: ac paulatim cepisse apostrophas fieri ad Sanctos, extra Dei cultum, optari etiam & vota fieri, non ad illos quidem primo, sed vt illi Deum orarent. Quod si hac fine exempla noua steterissent, ne Rex quidem illorum tēporū consuetudinem vehemēter reprehenderet: certe non ita damnaver, vt quod postea receptum est moribus. Beatos enim martyres & alios Sāctos, cum Christo, capite vtriusque Ecclesiæ, triumphantis & militantis, nunc regnantes, veneratur ipsius Maiestas, easque pro necessitatibus Ecclesiæ assidue orare non dubitat: precesque ipsorum nō esse inutiles firmiter credit. At quo auctore & quasi sponfore credatur, orantiū preces ab ipsis audiri, ac propterea pro Diis penatibus & tutelaribus eos esse habendos, id vero necire se ingenue fatetur. Quamobrem quæ deinceps post prima secula sunt secuta, mirifice Rex improbat: per gradus enim ad ea peruentū est quæ modo dicebamus, & quæ Ecclesia Anglicana cum summa impietate esse coniuncta, non veretur affirmare. Quod si in Patribus quarti se-

culi exempla reperiuntur alicuius inuocationis, (& quidem reperiuntur, neque hoc Rex nescit) fuit hoc nempe deficientis antiquæ simplicitatis & malitiam gliscentis indicium; eiusmodi tamen mali, quod nullo pacto cum iis sit conferendū, quæ hodie in Ecclesia Romana & fieri, & ferri, & doceri, atque defendi cernuntur. Postremo seculi illius morem inter vtilia aut licita si admitterent pii Patres: at inter absolute necessaria ad salutem, nunquam profecto posuerunt, atq. de his non de illis proprie sermo fuerat institutus. Et de quatuor quidem obiectionibus aduersus Liturgiam Anglicanam propositis hætenus.

Putat vero Rex, consultò factum esse à te, vt ex omnibus, quæ in ipsius religione minus probabas, ea potissimum seligeres, quæ ad synaxes pertinent. Nam communio inter fideles, in publicis maxime pietatis exercitiis est posita: atq. hoc est optatæ bonis vnionis vel præcipiū coagulum. Quare si de hac saltem re inter Christianos hodie conueniret, nihil vetaret, quominus inuicem populi Europæ communicarent: facta interim Doctoribus S. Theologiæ facultate, vt dogmatum aliorū, veritatem in scholis placide inquirerent. Quod quidem valde esset optandum: & hoc semel posito fundamento, bene de cætero, cum auxilio Dei, videri posset sperandū. Propterea Serenissimus Rex, tuum hac in parte iudicium apprimè laudans, faciendum putauit, vt ipse etiam ex iis quæ in liturgia vestra reprehendit, quædam hic adnotaret. Quod si propter illa quatuor, quæ ipse in Liturgia Anglicana desiderasti iusta satis causa est, vt tibi quidē vide-

batur, cur qui illa vtuntur nec credantur nec dicantur Catholici: viderit tua illustris dignitas, quid de Romana Ecclesia Regē pronuntiare oporteat: in cuius liturgia (nam alias partes religionis vestræ Rex nunc omittit) tam multa pij viri dudum obseruauerunt, verbo Dei & veteri fidei Catholicæ palàm repugnantia: quæ tamen defendere hodie, in hac luce veritatis, Romanus Pontifex mauult, quàm emendare. Et poterat quidem Rex nullo negotio, plurimos hic commemorare Liturgiæ Romanæ grauissimos errores: sed placuit ipsius Maieitati quatuor duntaxat afferre, quæ tuis illis quatuor, de quibus diximus opponit. Primū esto Linguae ignotæ vsus, contra Pauli admonitionem & primitiuæ Ecclesiæ praxin: quæ nihil habuit antiquius in suis synaxibus, publica vtilitate, & audientium ædificatione. Itaque verti S. Scripturam in omnes linguas Patres curarunt, & vt notat Epiphanius *ἐκ τῆς ἑβραϊκῆς* habuerunt, qui si opus esset, linguam in linguam verterent *ἐν ταῖς ἀναγκάσις*, inquit ille: hoc est, cum scripturæ populo legebantur. Sane vulgo fuisse intellecta, quæ recitabātur, vel illud vnicum euicerit, quod in singulis fere Patrum Græcorum & Romanorum homiliis occurrit, *ut audistis legi*, vel, *ut hodie lectum est*: quod hodie si vestris concionatores dicerent, ridicule facerent. Nam si quæ leguntur è libris diuinis, nihil eorum miser populus intelligit: qui tamen multo magis hodie, quam olim opus haberet, saltē in Ecclesia verbum Dei cum recitatur intelligere. Veteri enim cogeāt vnum quemque, vt libros

ut libros sacros domi assidue legeret: quin uic sub
anathematis pœna vetantur attingi, sine venia.
adeo ut inter libros prohibitos primum locum
libri sacri, & à Deo profecti, horrendum dictu,
teneant. Non ignorat Rex, etiam inter vos re-
periri Bibliorum versiones in linguas vulgares.
sed docuerunt eius Maiestatem Sacerdotes An-
gli, qui Duaci sacram paginam in sermonē An-
glicū verterūt, ab inuitis vobis esse expressas il-
las versiones, *importunitate hæreticorū*, ut loquū-
tur Duacenses. Nam illis velle Dei verbum so-
brie & reuerenter legere, hæresis est. Neq. igno-
rat Rex, quum in Gallicum idioma Renatus Be-
nedictus presbyter Biblia vertisset, quantum illi
molestiarum eam ob causam, Romani Ponti-
fices exhibuerint: qui etiam semel, literis ad
Episcopum Parisiensem datis, id agere eum ius-
serunt, ut omnes Gallicæ librorum Sacrorū ver-
siones, de manibus populi tollerentur. quod &
factū procul dubio fuisset, si nulli in Galliis Pro-
testantes extitissent. Nuper etiā legebat Serē-
nissimus Rex in libro Angli cuiusdam presbyte-
ri Pontificij, preces incognita lingua conceptas,
nescio quid maioris efficaciz habere, quā si
intelligeretur. quod insulsissimum delirium ab
ethnicis primò excogitatum, hodie nō est illius
presbyteri proprium. Secundus error esto sacræ
Eucharistiz mutilatio cōtra institutionē Chri-
sti, exēplū Pauli, & praxin cōtinuam Ecclesiæ in
publica synaxi, per annos minimū mille, fatente
etiā Casādro, viro eruditissimo. Tertio loco sū-
to Misæ sine cōmunicātibus, itē priuatz atq. aut-

gulares. Iam ante dictum, originem hæc habuisse peruersa doctrina de sacrificio in Ecclesia Christiana. Restituatur vetus fides, vetus praxis. Quarto loco profert Rex, imaginum hodiernum vsum, cultum atque adorationem. Fatentur abulum etiam Patres Tridentini: & Catechismus Rom. quædã vtiliter monet. Quid refert? manet error, probatur, defenditur, & gliscit in dies. Omittit Rex adorationem Sanctorum atque inuocationem. Vt sit hodie excusari res non potest, non debet. corrigantur non autem excusentur, quæ palàm cum lege Dei & vsu primitiue Ecclesiæ pugnant. Omittit reliquiarum adorationem religiosam, quæ & docetur hodie & exhibetur, vt res necessaria; aut plurimum certe ad salutem conducens. Accedit rei absurditas intolerabilis: vt cum falsæ reliquæ pro veris obtruduntur; aut palàm ridiculæ: vt cum lachrimæ Christi ostentantur, aut lac B. Virginis, & id genus alia. Omittit licentiam concionantium, extra dei verbum aberrantium, quibus lex poni debuerat, ne vllam populo doctrinam proponerent velut ad salutem necessariam, quæ ex oraculis diuinis non sit hausta, & primæ antiquitatis fidei contentiens. Ea namque est illa *ὁριζων διδασκαλία*, quã tot locis Apostolus commendat. Hac lege semel sancita, ruerit sponte sua, quæ hodie in Ecclesia Romana sunt permulta: ruet doctrina de indulgentiis; ruet putidum illud commentum de pœna intensua in purgatorio: vbi multa annorum millia in vna minuta comprehendi docentur, vi pœnæ istius

intensiuæ: ruent illæ in precibus ad Deū inanes
battologiæ, quas sibi non placere, Christus ipse
nos docet: neque amplius credetur magnū esse
meritum, si quis Rosarium suum, aut alias pre-
ces vel psalmos, ignota sibi lingua decies, vices
quingages, centies repetat. Istis incommodis,
& similibus aliis, si esset à vobis prospectum,
cur ab Ecclesiæ vestrę synaxibus Dei timentes
viri, putarent sibi abstinendum, nulla fortasse
amplius satis iusta causa restaret. Ne illud qui,
dem prætermittendum sibi Rex putauit, quod
sub finem tuæ epistolę habetur. Scribis enim, de
Romano Pontifice nolle te verba facere: quum
vel mediocriter in historia Ecclesiastica versatis
compertum sit primorum seculorum Patres,
Consilia & Imperatores Christianos, primas illi
semper detulisse, & præcellentis dignitatis præ-
rogatiuam, in omnibus negotiis, ad religionem
aut Ecclesiam spectantibus: atque hoc solum
exigere Ecclesiam vestram pro articulo fidei
credēdū ab iis, qui cōmunioni suæ se adiūgunt.
Ad hæc respondens Rex, fidem tuam appellat,
Illustrissime Cardinalis, petitque à te, vt animo
reputes facta Romanorum Pontificū ab annis
fere septingentis. Non vult eius Maiestas Ca-
marinā illam nunc mouere; scire tamen te cu-
pit, plane sibi fide certa notū atque exploratū
esse, hodiernos Pōtices eius Sedis vsque adeo
primorum Papatum esse dissimiles, fidei inte-
gritate, proposito vitæ, & totius administratio-
nis forma ac scopo, vt lōge iniquissimum putet,
rebus sic stantibus à prioribus seculis ad præsens

tempus trahere argumenta. Reddatur Ecclesiæ
sua pristina forma, & tot noua iura olim inaudi-
ta penitus tollantur. Denique rebus ipsis probet
Romanus Pontifex, non suam se, verum Dei
immortalis gloriam quærere, & populorum pa-
cem, concordiam & salutem sibi esse curæ: tum
Serenissimys Rex quod in Monitoria sua dudum
est protestatus, sine cunctatione primas illi defe-
feret, ipsumque *πάσης τῆς ἐκκλησίας πρόνοιν*, cum
Gregorio Nazianzeno, dicet non inuitus. Nunc
de illa Sede quid Ecclesia Dei statuere debeat,
imprimis autem Reges ac Principes, vel teipsū
Serenissimus Rex fert iudicem. Non enim ig-
noras, qua multi quotidie & Romæ, & ex om-
nibus iam Europæ angulis subinde libri prode-
ant, ad temporalē Papæ potestatem siue potius
omnipotētiā, & in Reges Principes ac popu-
los Orbis terrarū vniuersos *ἀπορίτω μοναρχίαν*
stabiliendā. Non ignoras, Cardinalē Bellarminū
super illo argumēto ea nuper scribere, & statim
a morte Henrici Magni publicare esse ausum,
quæ omnes boni etiam è vestris sunt detestati.
Bonī, inquam, & pii sunt vbique locorum dete-
stati: at complīces eiusdem conspirationis, ceu
profectum oraclū ex ore Pontificis, qui errare
non potest, tota voluntate suscipiunt, & pro vi-
rii sua multi defendere conātur. Itaque Iesuitæ
Ingolstadienses, in recente libro, quem aduersus
Iohānem Gordoniū Decanum Salisburiensem,
virum nobilissimū & doctissimū scriberent,
ex illo libro non secus argumenta ducunt, quā
si ea esset omnium Catholicorum constans &

consentiens opinio. At cogitet quæso tua illustris dignitas, quid simile primæua Ecclesia viderit, quò tendat hic vaxamus furor: diligenterque apud se expendat, in quantum ruinę vltimæ periculum Ecclesiam Christi coniciant, quicunque ea, quæ hodie fieri docerique videmus, probāt aut ferunt. Nam vt hoc solum dicam, de reconciliatione dissidētium Ecclesiæ mēbroŕū, quandiu apud vestros ea manebit rerum facies, & factæ diuisionis esse præbita occasio negabitur, vel cogitare merus fuerit stupor, mera stultitia. Vltimum illud erat in tuis: paratum esse te, perspicue demonstrare, quā bene in articulis hodie controuersis, Sedibus Patriarchalibus, quæ adhuc supersunt, cum Romana Ecclesia cōueniat. Verum eo labore posse te superledere Serenissimus Rex autumat. Scit Rex, sciunt alii omnes, harū rerum paullo saltē curiosiores, non solius Occidentis, sed etiam Orientis, Septentrionis ac Meridiei Ecclesias, ab aurea simplicitate primorum seculorum longe diceſſisse, ac longius etiam fortasse multo quā par erat. Scit etiam apud illos populos, ritibus ritus subinde esse accumulatos, & hominibus superstitiosis nimium vbique ab annis mille & amplius licuisse. At enim cum de reformāda Ecclesia Dei agitur, nō hoc opinor, quæritur, quid hodie Orientalis Ecclesia, aut Moschonica, vel aliz cōcedant facientue: sed id potius quæritur, quid, ab initio docuerint Apostoli, quid eorum temporibus, & proxime secutis Ecclesia vniuersalis vsurparit. Illud est exemplar, quod omnia amota,

exceptione, sequi velle se Rex ingenue atque ex animo profitetur. Quamquam ne illud quidem rerum Ecclesiasticarum periti cuiquam concesserint: doctrinam Ecclesiæ Romanæ per omnia hodie congruere cum doctrina, quæ in Ecclesiis aliorum Patriarcharum iam obtinet. Ne de cultu statuarum hodierno, igne purgatorio vestro, aut Romani Pontificis infinita potestate, etiam supra Concilia, similibusve aliis articulis quicquam hic dicam: certum est, in ipsa S. Eucharistiæ mystagogia multum diuersos esse Græcos à vobis Romanis: adeo vt non dubitaret Marcus Ephesus de Missa Romana loquens affirmare, ipsam in maximi momenti rebus, cum verbo Dei, & antiquis Liturgiis pugnare. *περὶ τοῦτον, αὐτὸς φέρει τὴν ἐναντίωσιν καὶ πρὸς τὰς παρὰ δωδεκάβιβας ἐκβάσεις, καὶ ἐξηγήσεις, καὶ πρὸς τὰ δεσποτικὰ ἔργματα καὶ πρὸς αὐτὰς τὰς ἐκείνων φωνὰς.* eos autem qui ritus Romanos hæc in parte defendūt, idem Marcus pronunciat *ἐλευθερὸς δικαίως τῆς διπλῆς ἀγνοίας, καὶ τῆς εἰς βάθος παρώσεως.* Sed hæc impræsentiarum satis. Habes, Illustrissime Cardinalis, expositas causas, cur Serenissim⁹ Magne Britanniæ Rex etiā post epistolam tuā lectam, Catholicū se esse, & Ecclesiam suam Catholicam, misericordia Dei fretus, credere, & certò affirmare non vereatur. Qui si in finito quodam desiderio adiuvandæ publicæ concordiæ non flagraret, aut te esse alienum ab eo proposito iudicaret, huius responsionis labore profecto supersedisset. quum præsertim eius Maiestas quotidiana vestrorum hominum facta scriptaque ad animū



reuocans prope iam habeat ratum & fixum, sicut ante dicebamus, nullam per illos iam superesse amplius ineundæ concordæ neque spem, neque rationem. tueri namque omnia est illis propositum, non proficere in melius, & seria rerum deprauatarum emendatione, piorum animos sibi conciliare. Quo in proposito quandiu vestri pergent, neque vllum antiquitati aut veritati locum dabunt, semel profitetur Serenissimus Rex, nihil se illos morari, neque vllam sibi communionem cum Ecclesia Romana, vquam futuram. Quod super est Dominum lesus veneratur ipsius Maiestas, vt quas in telarigiter contulit animi dotes excellentes, ad sui nominis gloriam, & vtilitatem Ecclesiæ velit semper dirigere. Vale, Illustrissime Domine. Londini V. Eidus Nouembr. 1610. CXI.

...the ... of ...